

AMISTAD

ANNO 2, NO. 4

ARUBA, DECEMBER 1972

Den E Numero Aki

Señoritanan di awendia ta
gusta homber casá

Señorita Si of No,
pa C. Zaandam - Médico

Cartanan ricibi

Receta di luna

Concurso

Farita Luydens a encontra
enlace matrimonial

Moda 1973

Entrevista importante cu
Sharon Berkley

Discurso di fin di aña di
lider di M.E.P. y P.P.A.

bon pascu



„Revista Amistad” awor mihor cu nunca
24 paginas pa solamente 50 ct.





*Srta. Sharon Berkley, nos orgujo
Arubano.*

Srta. Sharon Berkley, **nos "Voz di Oro" un cantante cu a triunfa hopi** **apesar cu e ta hopi jong.**

Mi a jega na cas di Sharon, mas tempran di loque tabata e afspraak. Mi a bati na porta y e servienta a habri e porta pa mi pasa paden. E cas manera tur otro casnan aki na Aruba riba diasabra tabata hajando su „grote beurt” manera e hulandesnan ta bisa. Sharon tin 18 aña y ta biba hunto cu su majornan y rumannan na Boerhaavestraat 9. Sharon ta e di 2 yui di famia BERKLEY. Pa ser mas completo Sharon ta yui di e conocido Comerciante Sr. Piet BERKLEY y su mama ta Sra. Olga BERKLEY-DOES. Di e famia aki a nace 5 yui, cual 2 ta homber y 3 muher. Sharon ta ruman di "Meredith", kende un tempo a jega di representa Aruba na eleccion di "MISS CARIBE" na Venezuela. Por cierto "Meredith" a hasi un tremendo propaganda y papel pa Aruba durante su participacion na e eleccion aki. Sra. Olga, un señora hopi sympatica a conta nos hopi di e eleccion aki. Tambe Sra. Olga tabata tin e honor di a presenta nos un photo-novela cual "Meredith" a traha hunto cu e famoso cantante Venezolano "GIMENO". E hecho aki merece sin duda for di basta tempo caba publicidad, pa un Arubana jega asina lew pa traha un photo-novela. Ta algo grandi pa nos Isla y ta juda den propagandá e pidi baranca stima aki. Biniendo back riba e combersacion cu Sharon, nos mester menciona cu ja caba Sharon a graba un disco 45. Un tempo Sharon tabata reina di Carnaval di "De Trupialen" y tambe finalista "Miss Teenage Oranjestad". Su potret a jega di aparece riba e calender di Amstel y tambe di La Bonanza. Walter SHEES, un cantante cu a jega di actua na Aruba Holiday Inn a duné hopi consejo promer di a participa den e festival di "Voz di Oro". Ah, nos a lubida di menciona cu e tabata bisti den un traje sumamente sexy y particular, e diasabra aki.

RED: Cuanto aña pasa bo a cuminsa canta?

SHARON: Tempo mi tabata tin 14 aña, pa ser exacto

aña 1968, durante un Songfestival organisa pa "Club De Trupialen". Esaki tabata mi promer presentacion den publico. E dia aki mi tabata hopi nervioso. Toch mi a logra obtené e segundo lugar. Nos mester a train hopi y tabata tin hopi participante, mi no ta corda e cifra exacto, pero esaki tabata varia entre 25 pa 40 mucha.

RED: Despues con bo a bolbe actua den publico?

SHARON: Despues di e festival di "De Trupialen" mi a keda train. Mi a keda algun tempo inactivo door cu mi tabata bai school. Mi a train basta tempo cu "Los x's" pa mi a actua durante eleccion di "Miss Teenage Cactus", na Centro Cultural, cantando e hitnan di e tempo ey, manera Venus - La Araña, etc. Aki mi por bisa cu mi a cuminsa haja acogida y e publico tabata apoja mi sin fin, dunando mi asina mas smaak pa sigui canta. Mi tabata sintimi manera e hendenan ta bisa "in de zevende hemel". Semper mi ta emociona mi mes ora mi canta, mi ta entrega mi mes totalmente den mi voz y mi ta purba complace e publico mas tanto cu mi por. Despues mi a actua varios tempo cu "The Magnificent Five", un agrupacion cu a juda mi hopi.

RED: Conta nos algo di bo actuacionnan?

SHARON: Aña 1970 mi a participa den e Song Festival na Aruba Caribbean Hotel, cu e cantica "Ruego di Infancia", akinan mi a termina na e cuarto (4) puesto. 1971, mi a gana e festival di "Voz di Oro". Mi a bai 2 biaha Bonaire, un riba invitacion di e Discoteca "E Wowo" y di 2 biaha cu e show di Ronny BRETE, cual a wordo filma na Bonaire pa Tele-Aruba (Showtime). Na Bonaire mi a haja hopi admiracion y e publico Boneriano ta hopi complaciente. Durante e 2 biahnan cu mi a bai Corsow, mi a actua den e Show di Angel JOB na television, tambe na Country Inn y den Pusycatt Discotheque. Na Colombia mi a actua den Hotel Presidente y 2 dia na television na canal 7. Tambe mi a bai Miami, riba invitacion di Toeristen Bureau, den e World Travel Show, cu participacion di tur e continentenan di Mundo. Aki na Aruba mi a actua den hopi shownan, hasta varios bez den misa. Actualmente mi a graba diferente video-tapenan, un pa Padu del Caribe y un otro pa Sonny SALAS. Ultimamente mi a actua den e show di Vitality Health Club, cu por cierto tabata bon prepara.

RED: Cual ta bo agrupacion favorito pa actua cuné?

SHARON: Tur, mi ta haja tur bon, basta nan aconpaja mi bon.

RED: Cual tabata bo dia di mas feliz?

SHARON: Dia mi a gana e festival di "Voz di Oro" naturalmente, esaki den mi bida artistica y den mi bida diario dia mi a obtene mi Mulo diploma.

RED: Cual tabata e dia di mas tristo?

SHARON: Bo sa mi a jega di haja un oferta di "Tita y su Cumbiamba" pa bai viaja cu nan, esaki lo a bai concerni un contracto di 2 aña. Pero for di principio mi majornan tabata contra, debi cu mi tabata demasiado jong. Ami mes tabata tin deseo pa acepta esaki, door cu den exterior bo tin mas oportunidad di truinfa. E dia cu a keda dicidi cu mi no por bai mas, tabata e dia di mas tristu di mi bida y te ainda mi tin duele ora mi papia riba e topico aki, mihor nos cambia di conbersacion. (Red: Tabata riparable cu esaki a cai Sharon hopi



Srta. Sharon Berkley, demostrando nos kiko e por riba piano, tambe nos por observa e diferente trofeonan y plakaat cu e a logra di gana durante un corto temporada cu e ta cantando.



Aki nos ta mira Sharon, scuchando nos preguntanan cu hopi atencion.

Continuacion di pag. 15

pisa y nos ta eens cu né, cu den exterior bo tin mas oportunidad pa truinfá).

RED: Cual ta e ultimo biaha cu bo a jora?

SHARON: Ami mas bien ta jora di alegría y e ultimo biaha cu mi a jora di alegría tabata dia mi a truinfá na Bogotá, durante mi actuación na televisión, mi tabata hopi emocioná cu e trato di hendenan den studio, esaki tabata un di e exitonan mas grandi di mi bida. E ultimo biaha cu mi a jora di tristesa tabata dia cu "Meredith", mi ruman muher, a viaja pa Hulanda.

RED: Kiko segun bo ta amor?

SHARON: Ora bo sinti cu no tin egoísmo mas den bo y bo ta comparti tur cos cu bo ser querido.

RED: Kiko bo ta opina di divorcio?

SHARON: No ta husto ora no tin comprendimiento entre un pareja. Ora stimación ta caba por completo pa bo pareja, esaki ta hasi bo bida insoportable. Pesei mi ta di acuerdo cu divorcio. Den matrimonio stimación y comprendimiento ta importante. Ora un pareja ta sinti cu no ta existi comprendimiento mas, mihor duna otro libertad pa nan por biba mas feliz. Imagina bo biba cu un persona cu bo no ta stima mas, esaki por causa bo hopi daño mentalmente y pesey divorcio ta bon.

RED: Duna nos bo opinion encuanto virginidad?

SHARON: Pa cuminsa mi kier a menciona bo lo siguiente: Ami personalmente ta contra di emancipación, den e sentido cu un muher ta bai bisti y comporta su mes, manera un homber, aki un muher mester keda como un muher y comporte como tal tambe. Pero voor de rest un muher por ta igual cu un homber, pakiko un homber si mag y un muher no. Ami no ta haya cu un mucha muher cu no ta virgen mas por bira infeliz den su bida matrimonial. Den e tempo moderno aki virginidad no ta di e importante ey y esaki no por kita bo di bira feliz. E generación nobo ta hopi mas moderno y tin otro conceptonan di cierto pensamentonan di loque nos bieeeunan ta pensa.

RED: Kiko bo ta pensa di relación sexual promer cu matrimonio?

SHARON: Francamente bisa mi no a pasa den e asunto ey ainda, pero door cu mi ta lesa hopi buki y door di a sigui combersacionnan importante cu dokternan, mi ta opina cu si un pareja ta stima otro di berdad y nan ta sigur di esaki y cu nan tin plan serio di encontra enlace matrimonial, mi no ta haya pakiko esaki no por tuma lugar, pero bo mester ta cien por ciento di boso estímación pa otro.

Tabata un placer pa combersa y interview Sharon. E ta un persona hopi inteligente y cu bon cultura. Su mama tambe ta hopi amable. Mi por bisa cu mi a sinti mi completamente na cas. Tambe mi tabata tin e honor di a mira varios album di Sharon. Aruba mester ta orgujoso di un cantante asina, cu ta promete di bira un di e grandinan di nos Isla. Sharon tin un futuro brillante su dilanti.